

11 OCT 2001

Lima-Azhar

DR MAHATHIR LANCAR "OCEAN WILD", EPIK PENGEMBARAAN AZHAR

Oleh: Noor Hammad Wariman

LANGKAWI, 11 Okt (Bernama) -- Perdana Menteri Datuk Seri Dr Mahathir Mohamad, hari ini melancarkan buku "Ocean Wild: the Jalur Gemilang Challenge", kisah pengembaraan dan pelayaran pelaut negara Datuk Azhar Mansor.

Dalam satu majlis ringkas tetapi amat bermakna sempena Pameran Antarabangsa Maritim dan Udara Langkawi (LIMA 2001), Dr Mahathir menerima naskhah pertama buku itu, yang ditandatangani oleh Azhar.

Buku itu yang diterbitkan oleh New Straits Times Sdn Bhd (NST), merupakan gabungan usaha oleh satu pasukan dari akhbar itu yang diberikan tanggungjawab mengumpul catatan harian, gambar peribadi, beribu-ribu e-mel dari rakyat Malaysia dan asing yang diterima Azhar serta sedutan filem yang diambil semasa pelayaran beliau, yang dimuatkan sebagai elemen visual dalam buku itu.

Ocean Wild ditulis dengan kerjasama Azhar yang mengambil masa beberapa bulan untuk menyelami dan menghayati impian pelaut itu untuk melakukan sesuatu yang luarbiasa.

Pelayaran mengelilingi dunia itu telah membawa Azhar mengharungi beberapa laluan laut berbahaya termasuk Tanjung Harapan yang suhunya amat sejuk serta dilanda ribut taufan.

Epik pelayaran Azhar bermula pada 2 Feb, 1999, meliputi lebih 21,000 batu nautika dan menamatkan pelayarannya dalam tempoh 190 hari. Beliau kembali ke tanah air pada malam 11 Ogos pada tahun yang sama.

Kepulangan beliau disiarkan secara langsung di TV dan diberikan sambutan wira oleh beribu-ribu orang termasuk Dr Mahathir.

Editor Kumpulan NST Datuk Ahmad A. Talib turut menyaksikan penyerahan buku itu oleh Azhar kepada Dr Mahathir.

Azhar berterima kasih dengan usaha NST menerbitkan buku yang mendokumenkan pengalamannya itu.

Beliau berharap buku itu dapat dijadikan rujukan oleh generasi muda.

Sebanyak 10,000 naskhah buku itu telah dicetak dan boleh didapati di semua kedai buku di seluruh negara.

-- BERNAMA

NH RHM